

de Uulewapper

OETGAVE VAN SJTADSVASTELAOVESVERENIGING D'N UUL REMUNJ



ff veursjtèlle:
de junior redaksie

Gesjminkt sjnuutje
mit móndjkepke

DJ ADMIN

Uulejónges flashback

De ganse waereld euver, mer
Vastelaovend in Remunj!

Trökblik 6x11 Kienjergarde

Kienjermusical online-challenge



Leef Uulkes en Uulinnekes

Ouch dit jaor is de Uulewapper toch weer giga-supervol gewaore, ondanks det veer door 't 'tiedelik abnomaal' neet de Vastelaovend kinne viere wie det normaal gebeurt.

Dit jaor gein thema in 't teike van de Kienjermusical, geine Sjtads(jeug)prins, gein feeste en zo zólle veer nog waal efkes door kinne gaon, maar det wille veer neet! Veer höbbe gedaon waat kin en moog en det is aevegood nog hééél get. Ónger angere waert deze Uulewapper bie bienao 11.111 brevebosse in 't Uuleriek hoes aan hoes bezorg, zodet alle kienjer toch eine Uulewapper kinne kriege, ómdet der op sjole neet oetgedeilt kint waere.

Wie eder jaor 'n paar tips óm zeker neet euver te sjlaon:

- eine oetgebreide kiek in 't laeve van D.J. Admin
- oos Junioriddaksie
- moppe, puzzels en tössedoar get extra aandach veur echte Remunjse Uulejónges en de Kienjer-en Jeuggarde
- waat D'n Uul allemaol digitaal en aan nuuj dinger geit doon.

**HEEL VÄÖL LAES- EN VASTELAOVESPLEZEER!
DE UULEWAPPERS**



Bëste óntvanger van de Uulewapper en 't Zjwetskammezaol

Veure uch lik de Uulewapper en 't Zjwetskammezaol. Sjtadvastelaovesvereniging D'n Uul vinjt det júús bezónjere tieje, óm bezónjere aksies vraoge. 't Algemeen Besjtuur van D'n Uul haet daoróm besjlaote óm dit jaor 't liefblaad veur de jeug van D'n Uul (de Uulewapper) en 't liefblaad van D'n Uul ('t Zjwetskammezaol) neet allein aan de de leje, mer och in 't ganse Uuleriek bie 7.500 addresse hoes aan hoes te gaon bezorge. Dit is één van de menere wo-op D'n Uul, in 'n sezoen wo-in Vastelaovend neet op traddiesjenele wieze gevierd kin waere, toch 't Vastelaovesgeveul 'coronaproof' wil oetdrage.

Zo laote veer uch och kinnis make mit 'ne kantj dae geer meugelik nog neet van D'n Uul kint. 't Ludiek gesjreve 'Vastelaoveswaord' en rieke 'Uuleproza' womit veer de Remunjse Vastelaoveskultuur laote veurtlaeve.

Daonaeve bringe veer op dees meneer och de bedriewe die D'n Uul zakelik sjeune bie 'n breijer pebliek ónger de aandach, júús in deze veur óngernaemers lastige tied. Names de greutje Uulefemielie zèk ich: "Estebleef en väöl laespleezer gewinst", vanzelfsjpraekend ónger oos jaormotto 2020; 'Vastelaovend, mit aafsjtandj' t sjoonste!'

Vórs-veurzitter Dirk I Franssen



Es geer noe eder jaor de prachtige Uulewapper en Zjwetskammezaol mit ouch de Uulepin van 't jaormotto van det jaor op de deurmatrijs wilt, maak uch pappa's en mamma's dan gans gek om uch lid van D'n Uul te make en kom ouch bie os Uulefemielie. Veur € 22,- per jaor zeen volwassene lid of veur € 11,- per jaor bösse jeuglid van D'n Uul. Dan profiteert geer geliek van álle veurdeile van ein Uule-lidmaotsjap.



DE ROERDASSE ...!!!

Biej 't oetrope van de Jeugprins gove de Roerdasse ein supergaaf optraeje. Veur de kienjer en maedjes van de Kienjer en Jeuggarde ein oetgelaeze kans óm "backstage" ins aan häör te laote merke wiej grote fens ziej zeen van dees men. De fensaals waerde oetgepak en een groepsfoto mit häör waas sjnel geknip.



Scouting bezorg 7.500 Zjwetskammezaole en Uulewappers in en óm de binnesjstad!

"Bezónjere tieje vraoge óm bezónjere aksies" dach 't Algemeen Besjtuur ómdet dit jaor de Vastelaovend door corona neet gevierz kin waere wie normaal. Zie wólle toch zoväöl es meugelik doon óm op 'n 'veilige' wies toch Vastelaovend te kinne bringe.

Twee zake wovan al flot bekind waar det die geweun gedaon kóste waere, ware 't Zjwetskammezaol en de Uulewapper oetbringe. Normaal kriege allein leje van D'n Uul die of ze waere verkoch of oetgedeild door D'n Uul.

Óm zoväöl meugelik miense toch 'n bietje Vastelaovespleezer te bringe, bedach 't Algemeen Besjtuur óm in 't ganse Uuleriek (de binnesjstad van Remunj) 't Zjwetskammezaol en de Uulewapper

hoes aan hoes veur nieks te bezorge. Det iedee is heel flot bedach mer wie kins se det ouch fetsoenlik regele?

Dao kwaam D'n Uul mit 'n sjlum en sjoon iedee: de 'Hendjes' van Scouting St. Hubertus oet Herte kinne det waal regele. Ruum 40 scouts mit begeleiders höbbe op 23 jannewarie in bienao 7.000 brevbösse in de Binnesjstad, Roerzicht, Roer-Zuid, Roerdelta, Hammerveldj, de Veursjstad en 't Vrieveldj hoes aan hoes 'ne Zjwetskammezaol en 'ne Uulewapper bezorg.

Heel erg bedank jónges en maedjes van St. Hubertus!



LEEF UULEKIENJER EN UULEJEUG, SJPESJAAL AAN ALLE DOEZENDJE EXTRA JEUGDIGE LAEZERS IN REMUNJ,

Eigelik zól noe de Vastelaovend veur uch allemaol weer lósgebarste mótte zeen! Oetkieke nao de väöle momente van sjpas en plezeer. Oetkieke nao de momente wo op D'n Uul mit Kienjergarde, Jeuggarde, Uulejónge, Damesgarde, Prinsekapel, Raod van XI, Dageliks Besjtuur én Senaat op sjtap zólle gaon. Netuurlik zól dao ouch oze Sjtadsjeugprins en Sjtadsprins mit häör adjudante bie zeen óm euveral es sjtraolend middelpuntj veurop te loupe. Mer jaomer genógo is in dit Vastelaovendsezoen alles ángers.

In 2020 waerde de gezondheidsprobleme sjteeds groter en waerde alles zo 'tiedelik abnormaal' dat D'n Uul mit pien in 't Vastelaoveshert, mer waal in al häör wiesheid, besjlaote haet óm geine Vastelaovend te viere. Daoróm zeen der jaomer genógo gein aktiviteite of ivvenemente wo det veer in gardepekske of Uulejóng-outfit of allemaol gans verkleijd Vastelaovend kinne viere.



Ouch is 't gans dreuvig det der geine Sjtadsprins en Sjtadsjeugprins zeen. Mer bie D'n Uul zeen veer kreatief gewaes en der is op väöl momente van alles nao boete gebrach waat veer waal nog allemaol doon. Al oos kemissies höbbe good häör bés gedaon óm ouch dinger te bedinke veur de Uulekienjer, Uulejeug en alle Remunjse jeugdige. Dao zeen veer greufts op en op veurhandj ein dieke merci aan ederein dae dao aan mitgeholpe haet!!

De kemissie **Kienjermusical** haet al in 2020 via väöl berichte op social media laote weite det der ein online challenge is bedach óm toch det Vastelaovendgeveul vás te haje. De leuke oetsjepkes mit de bös binne Remunj of mit ein besjumming örges in Limburg kinne noe jaomer genog neet doorgaon. Mer gelökkig is der waal get angers bedach, zodet de **Kienjer- en Jeuggarde** waal häöre maondjelang ingesjtudeerde dans kinne laot zeen. Det waert zellefs opgenaome en via de digitale kanale van D'n Uul versjpreid. En jaozeker, netuurlik in gardepekske! **En och jao, D'n Uul haet zellefs sinds kórte tied TikTok....** Deze Vórs módt dao nog eine kursus in kriege, want Insta en TikTok sjitaon nog neet op miene iPhone, waem wilt mich helpe...? Es bonus moog de Kienjer- en Jeuggarde tiedes de Vastelaovend in 2022 dae ingesjtudeerde dans ouch nog een paar keer laote zeen, zodet zie dan nog meer kinne optraeje. Veur de Uulejónge zeen der door de 'pappa-begeleiders' ouch get geheime en ruige aktiviteite bedach die waal kinne doorgaon. Netuurlik alles binne de regels, mer waal zodet zie toch nog same kinne zeen en get kattekwaad oet kinne haole. Daonaeve waert der gezamelik door alle leiding van de gardes en de Uulejónge nog get inein gefiespernöld óm te kieke óm toch nog eine keer same te kinne zeen. Ouch hie geldj netuurlik det dit gebeurt es det kan en dan binne de regels die der dan zeen.

Zo is dit jaor jaomer genógo dus alles angers. Waal is 't geweldig det de Uulewapper en 'de grote Zjwetskammezaol' neet allein aan de leje en sjponsore van D'n Uul waere bezorg. Nae, der waere in 't ganse Uuleriek bienao 11.111 Uulewappers en



Zjwetskammezaole hoes aan hoes versjpreid. Dit doon veer óm op die meneer juus in deze tied de Vastelaovend get extra bie alle kienjer en jeugdige te bringe.

EIN RÄÖDSELKE VEUR UCH:

**WAAT DINK GEER DET AL DIE BIENAO II.III
UULEWAPPERS WAEGE IN KILO'S...? DAE EINE
PERSOON DAE 'T PERSIES GOOD RAOJT OF DER
'T KÖRTSTE BIE ZIT WAERT GESIERD MIT EIN
HEUSE ÖNGERSJEIJING VAN D'N UUL, NAMELIK
MIT OZE JAORMEDALIE. '**

Prachtige jaormotto kint geer zeen in deze Uulewapper en is bedach door Roel Hendriks (ein van de sjrievers van de 'grote Zjwetskammezaol'): **'Vastelaovend, mit aafsjtandj 't sjoonste!'** Waat ouch sjiek is, is óm eine keer mit pap en/of mam door de sjtad te wanjle. Wanjel dan veural door de Heilige Geissjtraot en sjtop zeker bie Hamsjtraot 19. Dao zeen 2 ittelazjes aangekleijd mit Ulehistorie. En wat nog sjieker is, is det op de lokasie in de Hamsjtraot nao Asgoondaag ein verboewing sjtart óm dao eine Uule-fanstore mit museuminvulling te make. Dao kump ouch vás en zeker van alles euver de Kienjergarde, Jeuggarde, Uulejónges en Aad Sjtadsjeugprinse, dus laot uch verrasse!

Der is nog get sjieks veur dit jaor. Alle kemissies binne D'n Uul die mit kienjer of jeug te make höbbe, höbbe bedach óm **eine sjalink- en verkleijdwedsjtryed** te haje. Dit sjpryk netuurlik gans veur zich, kiek op de social media van D'n Uul en de Kienjermusical wie det geer mit kint doon. Dit is neet allein veur Uulekienjer, mer veur alle Remunjse kienjer!

Veer kieke ouch nog aeve trök nao 2020, 't jaor wo in veer waal flink de Vastelaovend kóste viere. En det haet ederein in Remunj, mer ouch in gans Limburg, geweite. Want wo 't kienjer- en jeuggezeljap van D'n Uul ouch waas, dao waerde gefees, gedans en gesjpronge! Zellef höbbe veer inkele van die sjieke

feesjes ouch mit kinne make mit uch en jao, sjnachs höbbe veer toen good gesjlaope! In 2020 zeen der ouch get dreuvige momente gewaes, ómdet der belangrike en hél wirkende Uule euverleje. Bie eine grote belangrike Uul oet de historie van de vereniging wille veer toch ouch hie aeve sjtilsjaon.

Aad Sjtadsprins 1969 **Huub I van Ool** mit ziene liefsjpreuk "", is van ós haer gegaon. Nao zien Prinsjap haaj Huub twelf jaor de veurzittershamer en hae sjting der óm bekind eine echter kienjervrundj te zeen. Huub droog de Kienjergarde (der waas toen nog gein Jeuggarde) altied een heel werm hert toe en zorgde derveur det de leiding van de Kienjergarde ouch altied genog göldes (toen ware der nog gein Euroos) haaj óm mit de kienjer leuke dinger te doon. Huub waar Grootmeester, Ereveurzitter en Senator van D'n Uul.

Es lèste in dit Vörstelik waord wille veer sjpesjaal nog eine keer oos prachtige Prinselike Gezeljappe van 2020 neume. Aad Sjtadsjeugprins Cas I mit adjudante Tijs en Keane, SAME mit Aad Sjtadsprins Vito I en adjudante Ayrton, Joep, Ramon. Chapeau wie det zie D'n Uul in 2020 zeen veurgegaon, merci daouveur!

Óndanks alle aktiviteite die veer dit jaor toch doon, kieke veer sjtiekem al veuroet en druime veer al euver 2022. Gans weg oet 't 'tiedelike abnormaal' trök nao 't geveul waat alle Vastelaovend vierende kienjer en jeug wille höbbe... **'Vastelaovend, mit aafsjtandj 't sjoonste!'** En vergaet neet: Vastelaovend viert ederein op zien eige wies... mer waal **SAME!**

*Vórs-veurzitter
Dirk I Franssen*

FF VEURSJTELLÉ: DE JUNIOR REDAKSIE

OOS 'JUNIOR' VERSJLAAGGAEFSTER

Ha! Ich bön Liz Engelen en bön 14 jaor. Ich zit in de 2e klas van de middelbare sjool Broekhin (Vrieje Sjool). Ich haaj van zinge, danse en aktere, beheer 't Tiktok-account van D'n Uul en bön ouch de jeugvlogger van de ECI Kultuurfebriek.

Doe kins en moogs mich volge es se wils op:

- Instagram: liz_engelen
- Tiktok: Liz_Engeltje_Snelle_Xo



OZE 'JUNIOR' VERTALER

Sjtel dich ins veur waem se bös en wieaad det se bös?

Ich bön Luuk Hendriks. Ich bön 18 jaor en woon same mit mien pap en mam, allebei gein ónbekinde binne D'n Uul, in 't sjoonste sjtök-ske Remunj. Det is namelijk aan 't pleintje bij restaurant TOFF in de Veursjtd. Ich bön oppe 11de vanne 11de gebaore in 't ziekehoes in Mesjtreesch, dus vastelaovend zit mich zeker in 't blood.

Wie viers doe normaal Vastelaovend?

Toet noe toe vierde ich meistal vastelaovend mit pap en mam. Ich bön neet zo van de drökkie pleine wó mien vrunj haer gaon. Daoróm vinj ich 't Remunjs Vastelaoves Meziek Sjpektakel 's zaoterraags op 't Kloosterwandjplein 'n gooij aanvulling in 't pergram. Op vastelaovesmaondaag netuurelik de optoch kieke en op dinsdaag 't Bacchusdrieve en daonao nao 't aaftraeje van de Sjadsprinse van D'n Uul.

Mien hoogtepunt van aafgeloupe jaor is same mit Katja 't Sjapsnazebal prizzentere. Sjoon óm te zeen det de allerkleinste de vastelaovend ouch al goed mit viere.

Det vertale, wie bös se dao ingerold en wat vinjs doe dao leuk/interessant aan?

Poeh, det weit ich allemaal neet meer zo persies. Waarsjenlik haet pap mich gevraog of ich ins ein artikel wól kórrigere (det beteikent det se de tèks kónterleers op de juuste Remunjse sjriefwieze). Det vónj ich in 't begin nog waal get lèstig, mer noe vinj ich 't hértsjikklike leuk óm te doon. Gelökkig haet pap dao ein heel gooij hulpje veur, namelijk 't Remunjs Waordebook. Sinds eind 2018 vertaal en kórrigeer ich artikele veur 't Zjwetskammezaol en netuurelik de Uulewapper. Waat ich dao zo leuk aan vinj is det se den zuus det de sjrievvers 't Remunjs eder op hääör eige meneer toepasse.

Waat vinjs doe van 't "Remunjs" es dialek?

Remunjs is een sjoon dialek. 't Klink allein neet meer zo wiej vreuger. In 't Historiehuis in de bieb sjteit 'ne tillefoon en es se dae aan dien oor hils en doe duufts den op ein knuupke, den heurs se wiej 't Remunjs vreuger gesjpraoke waerde, toet waal 400 jaor geleje. Remunjs sjreve is ouch nog neet zo gemekkelik. Der zeen väöl waord wó ein trema of ein sjtreeppke op ein of meerdere letters mójt sjtaon. Ich mójt waal eerlik bekinne det ich 't Mesjtreechs en 't Venloos dialek kwa klank ouch heel sjoon vinj.

Höbs doe dao ein opleiding veur gehad en welke is det?

Ich höb gein spesjale opleijing gehad veur 't vertale en kórrigere van tekste. Taal zit biej ós in de femielie. Ich doon 't geween op mien geveul en meistal zit 't den waal good.

Gebroek de jeug anger of nuuj wäörd den ajer luuj? Höbs doe dao get veurbelde van?

De jeug gebroek waal anger wäörd den de ajer luuj, veural es 't geit óm elkaar begroete. Die wäörd kómme oet 't Remunjs zowiej det heel

vreuger gesjpraoke waerde. De jeug sjprik elkaar aan mit wäörd es "naef" en "bink". Det heur ich ajer luuj neet zo flot doon.

Waat vinjs doe de drie leukste/sjoonste wäörd in 't Remunjs?

Wadat betref haet Aad Sjadsprins Vito I Campos (2020) mit ziene sjpreuk "Sjpan, sjpektakel" en oetsjpraoke en benaminge zowiej "kwante bieler" waal indrok op mich gemaak. Verder vinj ich wäörd es "fispernölle" ouch leuk gevónje.



D'N UUL VOLTOP DIGITAAL!

Sins begin dit jaor is D'n Uul op zo'n bietje alle populaire social media kanale aktief. D'n Uul waas al te volge op Facebook en Instagram, maar noe höbbe veer ouch ein eige YouTube kanaal en veer zeen aktief gewaore op TikTok. Door 't scanne van de óngersjtaonde QR-code kump se rechsjtreeks op oos accounts.

Gank ze volge, abonneer dich, deil wat der de kómmende tied op kump te sjtaon, maar sjtuur of deil mit ós veural leuke filmpkes die se zelf bedinks en maaks.

Vinjs doe 't leuk óm net wie Liz Engelen ouch es Junior Riddaktäör mit te doon in oos Instagram/IGTV of Tiktok-account en/of vinj se filmpkes make leuk, sjtuur dan ein mailtje nao pr@dn-uul.nl en gaef dich op.













De ganse waereld euver, mer ... Vastelaovend in Remunj!

De Remunjse DJ ADMIN drejt op vriedaag in Japan, op zaoterdag in Thailand, toert mit 't Red Bull Racing sirkes van Max Versjappe euver de ganse waereld, mer mit de Vastelaovend is t'r in Remunj. 't Aafgeloupe jaor leet hae de Sjolefestasie es aafsiloeter flink sjutere en noe maak d'r 'n album mit Limburgstalige knallers. Veer höbbe oze juniorreporter Liz op paad gesjtuurd óm DJ ADMIN 'ns aan de tandj te veule!



Ha Admin! Veurig jaor waars doe de aafsiloeter op de Sjolefestasie, wie waar det eigelik?

Det waar 'ne druim dae oetkwaam! Ich höb de lèste jaore vètte dinger moge doon mer wie ze mich vroge óm aaf te sjloete waas ich superblie. Op alle leuke dinger in Remunj, Solar, Op Dreef, OLS enzowiejer, höb ich al moge drejje en de Sjolefestasie waar 't lèste óntbraekende. Manjefiek pebliek en wat 'n fees, neet normaal! 't Waar ouch ein van de lèste sjieke dinger, want daonao kwaam corona al vrie flot.

Klop, toen loog alles obbins sjtil door corona. Wêlke shows höbs se allemaal mótte misse 't aafgeloupe jaor?

Bès väöl... Alles eigelik. Ich moogde drejje op Ultra Festival in Kroatië, 't gròtste festival ter waereld. Ich zól nege keer bie 'n Formule 1 race drejje, Australië, Oosteriek, Singapore, Zandvoort, neum mer op. Ging jaomer genòg neet door. En dan nog heel väöl weekende in Azië. Och troewens, ich zól ouch drejje op de Olymische Sjpele in Tokio. Nieks ging door... Allein 'n paar shows aafgeloupe zomer in Griekelandj. Dus de Sjolefestasie waar dit jaor éch de bóm.

De jóngeſ van Wiesſe Oet Zuus (die van de raos sjtickers) kwame ouch in dien show, traejt geer dökker same op?

Sins veurige Vastelaovend waal, zie vroge 'ne keer of ich häör show aanein kós breijs en drejje mer ouch det ich mien eige dink kós doon. Toen zeen veer ouch mer medein aan 'n nómmer begós. Sjteit ouch op de nuje cd: 'Oze Squad', 'n plaatje van ós same!

Höb ich geheurd, sjoon plaatje, nog sjiekere clip ouch! Doe bös noe eige tracks aan 't make, eers drejde se allein plaatjes van angere toch? Wie is det?

Vètste waat 'r is! Door corona höb ich de tied en dit waar 't bëste moment. Toet dit jaor had ich nog noojt 'n nómmer oetgebrach ómdet ich geine tied had door al 't optraeje. Dit jaor kómme d'r 12 nómmer oet en höb ich de enerzjie van de shows daoin gesjtaoke. 't Is zo vraemp óm te zeen, det waat se duis sjoon waert gevónje door jóngere. 't Is ouch waal 'n bietje 'n nuuj sjtruiming in Limburg. Sómmegé ajere miense dinke; "dit is geine Vastelaovend". Kin ich mich veursjtelle, die zègke; "ich heur allein mer boenk boenk". Mer ich doon 't veur de jeug. Kin good naevenein heur, dus naeve de traddiesjenele meziek. Vleisboeket waar pionier, ich gaon dao 'n bietje op wiejer en dao zólle weer angere jóngere mit wiejer gaon.

12 nuuj plaatjes, altied mit anger artieste, mit waem höbs se allemaol samegewirk?

Mit väöl artieste, Shakin' DJ's, B.I.N.K., Big Benny, Mike Kanders, Celine Kuepers, Beck & Bauer, Wiesſe Oet Zuus en nog väöl meer. D'r kump nog 'n tweede runjde mer dao moog ich nog nieks euver zègke.

Det gaon veer in de gater haje dus! En waem waar 't sjiekste óm mit te wirke?

Pfoeh... Zoväöl versjillende meziek, zoväöl sjtiele. 't Meis verrassende waar mit B.I.N.K en Big Benny. Veer ware allemaol fan van Big Benny en nog altied netuurlik, heel bezónjer óm mit zónne held same te wirke.

Euver helde gesjpooke, op tillevisie bie Jinek zoot se naeve BN'ers wie Ruud Gullit en Tom Egbers. Zeen d'r nog meer bereumpheje die se bös taegegekómme? Jao, ich kóm waal 'ns emes veur of nao 'n show taege, dus dan kruuts se allein aeve 't paad of doe zuus se in de chillruumte veur artieste. BOEF, Lil' Kleine, Harry en Lena van Ex on the Beach. En troewens, kins se Lucas & Steve? Die höbbe 'n biljard streams, det is doe�jend biljoen, neet normaal! Die sjtinge in 2011 al te drejje op 'n fees det ich in 'de Aek' (Azijnfabriek) georganiseerd had. Höb ich ouch nog waal dökker kóntak mit.

Laes verder op pagina 18 >



Mit Boef



Mit Deborah en Lena
van Ex on the beach



Mit Harry van 't Kamp
van Ex on the beach

Historiese exposisie D'n Uul in Remunjse ittelazjes

Sins 2 jannewarie itteleert Sjtadsvastelaovesvereniging D'n Uul ein deil van häör gesjiedenis in twee ittelaaşj in de Remunjse binnesjtd. De eerste ittelaaž is ingerich oppe Hamsjtraot 19 mit es thema: "1946, de eerste Vastelaovend nao de oorlog". De tweede is oppe Heilige Geissjtraot mit es titel: "de kuns van Vastelaovend". Alles vanoet de gedachte det wat Corona-proof kin kint doorgaan omwille van de tradisie en de toekóms van de Vastelaovend en 't jaormotto van D'n Uul: "Vastelaovend, mit aafsjtandj 't sjoonste!".

Ein deil van de ittelaaž oppe Hamsjtraot is ingerich mit Uule-herinneringe o.a. aan de handj van objekte euver Uule-Prins Rein I † 1946 en vanaaf 1962 t/m 1968 de tweede Uule-Vórs Rein I. In 1946 waerde óndanks de distribusie en bonné, toch Vastelaovend gevierd. Óndanks alle versjirkkinge tiejes de oorlog, waerde d'r naogedach euver 't viere van de eerste nao-oorlogse Vastelaovend. D'n Uul maakte een pergram, bals waerde georganiseerd, 't Zjwetskammezaol kwaam oet en d'r waerde eine Sjtadsprins oetgerope: Prins Rein I Pijls † mit ziene alles zègkende liefsjpreuk: "Veer laeve nog, waem duit ós get".

Door fotoos en dokumente waert ein biezunjer Vastelaoves-tiedbeeld gesjets. Te zeen zeen unieke dokumente oet 't Ulearchief aangevuld mit in brokleen gegaeve dinger. Beveurbeeld de Prinsemöts van Rein I en later zien Vóstemöts en angere Vastelaovessjpulle oet dae tied. Die laote de "Remunjse Vastelaovend" van 1946 en de jaore daonao herlaeve.

Daonaeve is d'r ruumte veur ein kórt euverzich Raod van XI mötse van dae tied toet noe. Aangevuld mit "Uule-jaormedalias, sjilderije en Uule-memorabilia oet versjilende periodes.

Ein tweede ittelaaž is ingerich oppe Heilige Geissjtraot, mit o.a. sjilderije van Gerard Nizet dae al versjillende jaore prachtige teikeninge maak in 't Zjwetskammezaol, dae netuurlik dit jaor ouch weer oet is gekómme.

Scan de QR-code veur ein filmpke.



UULEJÓNGES FLASHBACK

De leukste herinneringen aan de Uulejónges2020. Veer höbbecke de Uulejónges gevraog waat ziej 't sjoonste aan de veurige vastelaovend vónje en dit waas häör verhaol:

Bastiaan (9) 'waas sjoon om mitte Uulejónges te keete biej 't Witte Kirkske. Ouch 't fees det veer höbbecke gemaak in Weert waas heel leuk. Mer 't sjoonste dit jäör waas toch waal weer de optoch (mit os eige) en de opkoms oppe Sjolefestasie.

Joep 11 jaar: in de bus sjheels rope: "Wilma zitten". De optoch waaa te gek. Met zien allen lol trappen. En natuurlijk sjlok aete. En kienjer van andere verenigingen vervaele.

Jesse (9) in de optoch oppe wagen sjlok gooien vonj ich supercool. Stiekem stickers plekke en met de lift sjipele met de jongens samen in de Oranjerie waas gaaf! Eigenlijk waas alles top!

Youp (12) de lol dae veer same höbbn en dat iedereen zich good versjiteit! Ouch de discussie veurig jaor mit de jongens van de Kits Uule over waem noe de echte Uule zijn!

Nick (10) waat ich top vonj waas het samen dinger doon en 'tt gezellig samenzeen. Het leukste ware de sjolefestasie en de optoch!

Sep (8) De optoch! Op dae grote wagen, met alle jongens bijein. Sjlok aete en oetdeile! En geweun de gezelligheid met alle jongens bieein!

Sebas (9) ós leedje op 't wc-hoofdketeer van de Uulejónges in 't Witte Kirkske, "Welkom op de WC, doe maar lekker maf...". 't Same zinge en lekker rebels doon, sjtiekkem nao boete mit zien alle. En netuurlik euveral stickers plékke wao t eigelik neet moog.

Ties (9) waat waas det te gek op dae wage in de optoch! Det sjíók goede waas supergaaf. En zelluf netuurlik ouch lekker get sjíókke. De kienjermiddaag in Weert waas ouch gaaf. Dao höbbecke veer es Uulejeug toet 't letst heerlik vastelaovend gevierd en de toko gesjlaote. En toen weer trök in de bus nao Remunj mit de Uulejonges, jeugprins, kienjergarde en jeuggarde nog aeve wiejer gefui!

Tijl (9) 't Allersjoonste waas stickers plekke mit de ander Uulejónges en ouch op de optochwage waas heel leuk en al 't kattekwaod netuurlik, mer dao kin ich baeter nieks euver zegke!

Vince (8) Ik vonj 't super tof om tiedes de Sjolefestasie op 't grote podium te danse. Sjlok goede vanaaf de wagen bij de mensen nao binne waas ouch te gek!

Jip (8) Ik vonj 't leukste 't trommelen en het optraeje op de Sjolefestatie woe veer mochten danse op Sjuuf, Trek, Blaos en Klep.



KIENJERMUSICAL ONLINE-CHALLENGE

WAAT KIEKE VEER TRÖK OP 'NE SJITTEREND SJIEKE KIENJERMUSICAL 2020, "SJPROOKJES-SUUPKE". ZOVÄÖL OEFENE, ZOVÄÖL INZAT EN ZOVÄÖL TALENT! 'T SJPATTE D'R VANAAF ÓNGER DE VEURSJETELLINGE OP ZÓndaag 16 FIBBERWARIE 2020 IN DE ORANJERIE.



Veer ware dan ouch gans enthousiast óm aan 'n nuuj sezoen te beginne, wie 'n paar waeke later obbins corona oetbrook. Eers haopde veer nog det 't allemaol waal mitveel en det 't flot veurbie zól zeen. Mer óngertösse weite veer det 't nog een hele tied geit doore veurdet dit vervaelende virus helemaal ónger kóntraoi is.

Det beteikent det veer biejein zeen gaon zitte en höbbe naogedach euver dit sezoen. Geweun doorgaon mit 'n riggeliere Kienjermusical produksie waar jaomer genóg neet meugelik, zeker noe ouch Theaterhotel de Oranjerie haet aangegeave veurluipig nog neet aope te gaon vanwaeghe corona. Avel, gaar nieks doon waar veur ós ouch gein opsie. Veer zólle 't namelik jaomer vinje es al oos jeugdig talent dit jaor neet zól kinne 'shinen'.

En dus zeen veer es Kemissie Kienjermusical op zeuk gegaon nao alternatieve. 't Leefs hadde veer daobie get gedaon wobie veer mit zien alle same mit dans, zank en toneel bezig hadde kinne zeen. Jaomer genóg geit det dit jaor neet lökke. Vanwaeghe alle regels wo veer

ós door corona aan mótte haje, is dit te lastig. Daoróm höbbe veer besjlaote det de Kienjermusical dit jaor online geit. En alle kienjer moge netuurlik mitdoon.

Dus höbbe veer oos kienjer gevraog óm 'n kórt filmke in te sjture. 't Filmke moogde gaon euver 't favoriete óngerdeil/fragment/denske/scene, euver get achter de sjirme of juus van op de bühne, euver wie sjoon opa en oma 't gehad höbbe wie ze zeen kómme kieke of euver vrunjsjappe die aan de Kienjermusical zeen euvergehaje. In prinsiep waar alles oké, zolang 't mer pözzetief waar en euver de Kienjermusical ging.

VANAAF BEGIN JANNEWARIE 2021 TOET EN MIT 'T VASTELAOVESWAEKINJ ZÓLLE DE FILMKES EN ANGERE SJIEKE KIENJERMUSICAL FRAGMENTE TE ZEEN ZEEN OP INSTAGRAM, FACEBOOK EN 'T EIGE YOUTUBE-KENAAL VAN DE KIENJERMUSICAL. Volg ós dus vieje social media en abbeneer dich op oos Youtube-kenaal óm nieks te misse. Jaomer genóg kinne veer neet same optraeje. Mer op dees meneer kinne veer toch, ouch dit jaor, 'n bietje van 't Kienjermusical Vastelaovesgeul mitmake.

Volgend jaor haope veer allemaal det corona weer veurbie is en det veer weer 'n sjoon veursjtëlling kinne make. 't Waekinj veur Vastelaovend 2022 is de Oranjerie in eder geval alvas gerizzeerd veur de Kienjermusical van D'n Uul.



SJOOLMÖPKÉ

Raf neump altied klitsketjes* mit nao de Willem de Zjwigersjool. Zaet juf Angela: "Det moog neet, gein gesjlók in de klas, Raf!" Ze pak alles aaf en it 't nao de lès zelf op. De volgende daag gebeurt 't nog ins. Dan haet Raf obbins gein klitsketjes meer. Vreug juf Angela; "Höbs se gein klitsketjes bie dich vandaag?" Zaet Raf: "Nae, miene knien is giester gesjtörve."



* Drop(jes) waere in ech Remunjs geweun Klits(ketjes) geneump.



SJOOLMÖPKÉ

Meziekmeester Hub leut de kienjer 'ne piano zeen. "Waem van uch wèt wat 't versjil is tösse die witte en zjwarste toetse?" Isaac sjtik ziene vinger op: "Ich weit 't, die witte toetse zeen veur broelofte en de zjwarste veur begrafenisse!"

DE KIENJERGARDE



14



Ich bön **Julie Houben** en ich bön 7 jaor. Sins miene pap adjudant waas bie Aadprins Rogér II kiek ich al vol bewónjering nao alle danse van de gardes en noe zit ich d'r zelf bie! Ich haaj heel erg van danse, trampoline springe, filmpkes make en van miene hóndj Harrie!

Ich bön **Madeleine Geenen**, ich bön 6 jaor. Ich bön gebaore op asgoonsdig. Ich haaj van danse, sjpringe, hosse en gezelligheid. Ich mis vastelaovend nooit en bön al vanaaf mien gebaorte lid van d'n Uul. Ik höb al twee keer mitgedaan aan de kienjermusical en vinj 't jaomer det 't door corona dit jaor neet door kint gaon. Oze knien hit Miss Brownie. Miene favoriete vastelaoveshit is roetewisser van Fabrizio.

2020-2021



Hoi, Ich bön **Liss Aben**. E Remunjs maedje mit vastelaovesblood in mich. Miene pap is 3 keer adjudant gewaes, mien mam is altijd dansmarietje gewaes en miene opa is senator bie D'n Uul. Mien hobbies zeen handibal en danse. Ich sjpeel gaer mit mie babybreurke Lux en ich zit in groep 3 van de montessori sjool. Ich loester 't leefs nao vastelaovesleedjes en zing en dans dan och flink mit.

Ich bön **Mila Tobben** en ich bön 6 jaor. Ich zit in groep 3 van de Sjtapsjtein in Herte. Mekronie aet ich 't leefs en ich zing gaer leedjes van de top 40. Ich boew gaer mit Lego friends en kiek vanalles waat sjoon is op Netflix. Mit de vastelaovend gaon ich döks mit pap en mam op sjooj. Meistal bön ich dan te vinje bie de Bacchusklup Remunj. Mien sjoonste herinnering waas toet noe toe det ich op 't podium moogde sjtaon van de Sjolefestasie en 't Bacchusdrieve. Ich kiek d'r nao oet óm mit de kienjergarde te danse door alle sjtraote van Remunj'.

Miene naam is **Valerie van Rey**. Ich bön 7 jaor en same mit mie broor Jimi zit ich oppe Sjteine Brök in de sjstad. Edere zaoterdig móit ich nao paerdrieje in Naer en ich verheug mich och altied oppe zaoterdigavend as ich kin gaon danse in 't Witte Kérkske. Ich bön och gek op miene hóndj Fenno en kiek op TV gaer nao "Vrije Teugels", och euver paerd. Verder make pap of mam mich altied blie mit frietjes en e sjnackske!

Ich bön **Frederieke Linssen**, dochter van Aad Prins Roger II. Mie breurke zit bie de Uulejónges. Wie de damesgarde veur miene pap dansde sjting ich altied veuraan te kieke. Toen wis ich al det ich det och wól doon en waerde ich op de wachlies gezat, same mit mie vrundinneke Julie. Mie lievelingsleedje is D.A.N.Z.E. Van de Funky Marys.

Ich bön **Renee**, ich bön dit jaor och e bietje nuuj (mer och weer neet) bie de kienjergarde. Ich bön Renée en ich bön dit jaor gesjart óm same mit Marijn leiding te zeen van de kienjergarde. Ich höb zelf och bie de KG, JG en DG gezaete. En det waas 'ne ónvergaetelike tied. Dao höb ich sjoon herinneringe aan en och vrundinne door gekrege. Mit Rob höb ich same 2 kienjer, Fien en Ties. Ich haop det veer volgend jaor weer mit z'n alle same kinne danse en pleezeer make!

De Uulle Gezet

De Alleskinners

Doe höbs van die kaerels die zich neet zo op de veurgrondj dringe, die gein sjpótleech neudig höbbe, die talente op väöl versjillende vlakke höbbe, die dao neet mit te koup loupe, die neet meug of kepot te kriege zeen, die altied klaor sjtaon om bie te sjpringe als det neudig is en wo de hele Uul op kint raekene. Die kaerels, die zitte bie de Raod van XI en dao zit zelfs meziek inne.



Crit, de dekselsklepper

Top 11 aete



1. Sushi van Hinata
2. Burgers van Wieck
3. Breudje Rudolph van Doedels
4. Pizza van Jaffa (Toni)
5. Burgers van Burgers Enzo
6. Spareribs van Opsjtap Bar & Bik
7. Saté van Faubourg
8. Friekandel sjpesjaal van Stap-inn
9. Pasta carbonara van Verkoch
10. Carpaccio van Toff
11. Big Mac van McDonalds



Ittelazjes 2020

Aafgeloupe Vastelaovessezoen waerde veur 't eers twee ittelazjes in de binnesjadt ingerich mit biezónjere veurwerpe en fotoos oet de rieke Uulehistorie, de zogenaamde Uularia.

Op dónderdaag 16 jannewarie waerde beide ittelazjes onthuld door de twee prinse van D'n Uul: Sjtadsjeugprins Cas I en Sjtadsprins Vito I.

De ittelasj op de Heilige Geis-sjtraot goof een prachtig euverzich van 6 x 11 Kienjergarde en

sjting vol mit gebroeksveurwerpe, gardepekskes en fotoos door de loup van de jaore. In de ittelasj oppe Hamsjtraot ware väöl unieke Uularia en gebroeksveurwerpe te bekiele: Prinse- en Vorstemötse, Prinsepakke, ongersjeiinge, oorkondes, fotoos, vlagge en vaandels, kedoos en kunswerke.

Ouch dit jaor waere der weer twee ittelasjes ingerich, meer dao euver sjteit op pagina 10 in deze Ulewapper.

Juf Willemijn vreug aan de kleuters oet häör klas: "Waem van uch kin de seoene van 'tjaor opneume?" Ein maedje sjtik de vinger op. "Zèk 't mer Emma!" "Herfs, wintjer...", begint Emma mer wiejer blief 't sjtil. "Wo blieve 't veurjaor* en de zomer, Emma?", vreug de juf. Emma zaet: "Jao, det vroog ich mich dus ouch al aaf!"

* In 't Remunjs besjiteit 't waord lente eigelik neet mer zègke veer veurjaor.



Cool heur! Euver det optraeje, höbs se waal 'ns 'ne blunder gemaak op de bühne? Beveurbeld; "How are you Bangkok?!" Terwiel se in Tokio sjtings ofzo...

Jao, genogl! Mer de sjoonste waar nao aafloup van 'n show. Ich ging in Singapore nao 'n show get aete. Kreeg ich 'n menukaart mit plaatjes. Ich zoog kip... Ich besjèl det, de ober brink mich det en ich dus lekker mouze. Kump d'r trök, vroog t'r mich in gebreklik Ingels; "enne, haet 't gesjmaak?" Dus zèk ich; "Good chicken!". Hae kiek mich aan en zaet: "No chicken, frog, frog, frog!" Had ich in plaats van kip dus kwekkerd zitte bikke.

Getver, kwekkerd! Blewgh!! Höbs se meer van zón aetgeweuntes?

In 't boetelandj perbeer ich alles waal aeve oet, sjorpioen, krekel enzowiejer. Aeve perbere netuurlik. Mer wat waal 'n bietje vraemp is, is det ich aet op Nederlandse tieje óm geine jetlag te kriege. Bön ich in Japan, óntbijt ich sjmiddags, dan laef ich eigelik in 't Nederlandse ritme.

En óntspanning dan? Sjpeels se games?

Bienao neet, ich gaon mit Red Bull Racing dan mit Max mit, veur de Max Versjtappe triebunes en daoróm sjpeel ich eigelik allein F1 op miene Playstation. Waal sjiek óm

de circuits 'n bietje te kinne en de Formule 1 te sjnappe. Moog Max dan 'ne keer geine zin höbbe óm te rieje sjtaon ich geliek vaerdig óm in te valle!

In de clip van Oze Squad zitte Ferrari's, doe drejs bie de Formule 1 en in de clip van GAAS geis se mit Big Benny karte. Höbs se get mit sjnelle outoos?

Jao, örges waal, ich vinj sjnelle outoos bès waal vèt, höb zelf bès 'ne sjnelle Mercedes CLA. Mer gein zorge heur, op de aopebare waeg, haaj ich mich aan de sjnelheid.

En Vastelaoveswages? Es dich zelf 'ne Vastelaoveswage moogs make, wie zól dae d'r dan oetzeen?

Sjoon vraog! Waat ich altied heel vèt vinj, vreuger had se in de Love Parade in Berlien wages mit heel väöl miense en 'ne DJ. En det is miene Vastelaovend, same viere, same sjpringe. 'ne Wage wo ich baovenop zól sjtaon en ederein op dae wage zól sjpringe, waat zól det 'n fees zeen! Ich drej noe op de wage bie de Veldjmuus, dao sjteit de prins sentraal mer op miene wage zól dan de DJ sentraal sjtaon.



Mit Dave Roebrink



Mit Tsjebboy Jay en Emma Keuven

Veer höbbe ouch nog drie vraoge van jóng Uule en Uulewapper laezers, lèt op: hink de wc-ról bie dich toes mit 't pepeer taege de moer of juus neet?

Juus neet, mer det doon ich neet bewös. 't Hink noe einmaol wie 't hink...

En de volgende is 'n vieze. Leuts se waal 'ns 'ne sjeet in bëd om daonao ónger 't dèkbèd te gaon ruke?

Ónbewös vas waal, mer bewös neet... Neet det ich weit...

Höbs se 'n TikTok account en 'n favoriet denske?

Ai! ich höb TikTok, (@djadminnl) mer ich bön neet ritmisich, 'n denske mós se neet aan mich euverlaote, det geit pien aan eur uig doon.

Es t'r 'ne 'The DJ of Holland' talentejach zól kómme, duis se dan mit?

Jao, mer neet vanwaege mien talent, ich höb neet zo heel väöl muziekaal talent. Doe höbs bie voetballe, tennis en DJ'en van die netuurtalente en helle wirkers. Ich bön geine Messi of Ronaldo mit heel väöl talent, mer meer 'ne helle wirker wie Dirk Kuyt. Veur jónge DJ's vinj ich 't heel belangriek óm mit te doon óm in dichzelf te geluive. Ich zól dan ouch mitdoon es veurbeld, det se mit väöl en hel wirke ouch heel väöl kins bereike.

Hel wirke dus. Bie D'n Uul zitte ouch väöl jóngere die DJ'en, höbs se nog meer tips?

Good óm te heure, jaozeker! Veur pebliek blieve drejje, ouch op kleine feesjes veur 10 of 15 man. Dus ouch es se al in de ECI gedrejd höbs, geweun de kleine dinger blieve doon en ervaring blieve opdoon. Heel väöl traine dus en volhaje! Nooit gedemotiveerd rake, ich höb ouch lang mótte wachte óm veur de eerste keer op SOLAR

Laes verder op pagina 28 >



in de Weerd te sjtaon. Gaef neet te sjnel op, doe bös neet medein mieljenaer mer es se 't wils en doe bliefs oefene, kins se wied kómme.

Sjoon gesjprooke, ich kin waal merke det se ouch leraar bös. Admin, bedank det veer dich 'n bietje baeter moogde lere kinne. Haopelik kinne veer volgend jaor mit Vastelaovend weer lekker feeste op dien plaatjes!



Lithouwen



Thailand



China



TRÖKBLIK 6X11 KIENJERGARDE

De KG van D'n Uul besjting in 2020 6 x 11 jaor. Daoróm höbbe veer zaoterdaag 18 jannewarie 'ne drökbézchde feesmiddaag mit reünie gehaje in 't Witte Kirkske. Alle Aad KG-maedjes, trainsters, begeleiding en alle miense die get beteikend höbbe veur de KG ware perzent. 't Waar 'ne feesmiddaag en reünie veur jónk en Aad. D'r kwame in de loup van de middaag versjillende vereniginge óm dit mit ós mit te viere en artieste Tessa zóng de sjettere van de hemel!

't Bleek det 't 'gardevirus' döks waert doorgegaae van de ein ginnerasie op de anger. Kienjergarde, jeuggarde, damesgarde en daonao döks es trainster, choreografe of begeleider betrokke blyve. Of de elders/grootelders kalle gezellig mit elkaar aan de bar van 't Witte Kirkske ónger de waekelekse rippettiesies. De Kienjer-, Jeuggarde en de Uulejónges zeen daomit lètterlik 'n hechte Ulefemielie. En die femielie greujt eder jaor!

D'r waar 'n hele sjone fotowandj gemaak, doe kós de verhaole van vreuger, vertèld door Aad KG-maedjes, euveral heure. D'r waerde väöl herinneringe opgehaold. Goje mit häör bein hoog in de lóch, get waat de grootmoders in häör tieb neet hoofde te doon. Die

deje gein denskes, die hoofde allein naeve de jeugprins te peradere en vanaaf de wage te zjwejje. Naeve dees foto's ware och de versjillende gardepekskes in de loup der jaore te bewónjere, zelfs 'ne tied lang in de kleure pulper (paars) en gael, de meis lilke pekskes ooij volges väöle. Oefene baove de sjportwinkel in de Bröksjtraot van Maatje van den Bergh, de oprichster van de Kienjergarde. 'n Paar gezette ónger 't gardepekske es 't kaad waar ónger de optoch. Sjólk höbbe alle ginnerasies gooij herinneringe aan; det de maedjes dit van de wage moge goje mer och zelf nao binne moge wirke. En veural väöl sjieps en cola!

Allemaal sjoon herinneringe mer één dink vónje alle ginnerasies 't sjiekste van häöre tied bie de gardes: de gezelligheid en de intense jaore lange vrunjsjappe mit elkaar. Heel döks, vrunj veur 't laeve.

't Waar 'ne supergezellige feesmiddaag/reünie en es aandinke höbbe alle Aad KG-maedjes 'n sjoon sjpang es herinnering gekrege.

OP NAO 7 X 11...



Alle (Aad)-Kienjergardemaedjes biejein



3 Generasies
Kienjergardemaedjes



Sjadsjeugprins Cas I kump
zien Kienjergarde fillisitere



De dames van
de organisasie



Vórs Dirk I trakteert de
Kienjergarde op McD.



De Uulejónges
bringe ein serenade

21

Jeuggarde op de Sjolefestasie

Väöl maedjes van de Jeuggarde vónje 't vèt sjappennend: häör Jeuggardedenske doon veur ein mit pebliek volgepak Sjtasieplein. Ze hadde der ein pakkend meziekske veur gemaak, ein sjetterend denske bedach en der waeke lank veur geoefend. En toen gingde de maedjes der, vol van de zenewe, veur zo'n 20.000 man helemaal op los. En 't pebliek ouch! Via de QR-code kins se 't ganse denske bekike.



D'R KUMP EIN UULE FENSTORE!

Nao Asgoonsdaag waert de winkel oppe Hamsjtraot, wo noe de Uule-ittelaasj is, ómgeboewd toet eine Uulewinkel en mizeejum. Nao dae omboew zeen d'r dan neet allein Uule-artikele te koup mer waert de ganse, eerdere winkelruimte, gesierd mit aaj Uule zake en kint ederein dao ins gaon kieke. D'n Uul is d'r bezunjer greuts op óm op dees meneer ein sjtepke veuroet te zitte in 't aopesjelle van häör sjatkamer mit riek gevulde Uulehistoriej.



Vastelaoves waordzeuker

Sjtreep al dees wöärd door. De letters die euverblieve vorme ein nuuj waord. Det waord is de oplossing van deze puuzel.

K	E	S	E	K	S	U	U	M	J	D	L	E	V
O	E	K	A	M	M	E	R	A	O	D	E	G	A
R	P	I	S	J	T	R	A	O	T	F	J	N	S
B	E	T	J	K	V	P	R	U	U	K	I	I	T
E	E	T	O	S	E	G	A	T	V	E	E	R	E
N	K	R	K	C	A	P	J	R	L	L	L	P	L
I	S	A	S	O	H	S	U	P	E	K	K	J	A
E	E	O	N	T	D	N	R	E	E	L	R	S	O
T	A	T	L	A	J	E	F	A	V	E	E	O	V
J	L	E	N	T	T	D	P	V	E	U	V	S	E
S	G	S	E	S	E	G	E	P	K	R	E	K	N
E	E	L	N	S	O	O	M	D	O	O	R	R	D
R	I	U	J	O	E	K	S	K	A	P	E	L	P
K	M	N	I	E	L	P	E	I	S	A	T	J	S

Danser	Sjpringe
Doorgaon	Sjtasieplein
Glaeske	Sjtraot
Joekskapel	Sjtuf
Kammeraod	Trääte
Kleur	Vastelaovend
Leefde	Veldjmuuskes
Munsterplein	Verkleije
Optoch	Vrunjtelik
Pekske	
Poppedokter	
Preuve	
Pruuk	
Rood moos	
Sjeine Brök	
Sjiek	

SJOOLMÖPKÉ

Op de Sjeine Brök krieg groep ach veur 't eers lès van 'ne meister. Hae wilt kieke of de kienjer waal genög in zichzelf geluive. Daoróm zaet 'r: "Waem dóm is mótt gaon sjtaon." Nao inkele menute sjeit Jimi op en de meister vreug: "Dinks doe ech det se dóm bös?" "Nae", zaet Jimi, "Mer ich vónj 't 'n bietje zielig det geer de insigste waar dae sjting."



SJOOLMÖPKÉ

In de gesjiedenislès op Aan de Roer zit Lola te sjlaope. Juffrouw vreug aan Mo óm 'm wakker te sjödde: "Wo sjtórf Nepolejóng*?" Lola zaet: "Half oer geleje... Op bladzeij 72 van 't gesjiedenisbook."

* Napoleon haet in Remunj 'ne echte eige naam; Nepolejóng!



DE JEUGGARDE

2020-2021





Hoi, ich bön **FLOOR STROEKEN** en ich bön 12 jaor. Ich zit nao 'n paar jaor Kienjergarde noe veur 't eerste jaor bie de Jeuggarde. Supersjiek mer waal jaomer netuurlik det 't he angere Vastelaovend waert dan angers. Mien favoriete Vastelaovesleedje is 'Ein Dingk' van Vleisboeket. Ich haop det veer volgind sezoen geweun weer kinne optraeje. Dao höb ich noe al zin in!

Veer zeen **ELISA (L) EN VIENNA PRESTIGIACOMO**. Veer zeen 12 jaor aad en veer zitte al vanaaf det veer 6 zeen bie de gardes van D'n Uul. Eers bie de kienjer en noe bie de jeug. Oze hobby's zeen hockey, chille mit vrundinne en netuurlik danse. Aafgeloupe jaor zeen veer veur 't eers nao de Sjolefestasie gewaes en det waar ech heel sjoon!

Hoi, ich bön **LEE-VIENNA**, ich bön 12 jaor en vinj 't heel sjiek óm te danse bie de Jeuggarde. Ich höb 2 jaor bie de Kienjergarde gezaete en dit is mien eerste jaor bie de Jeuggarde. Ich vinj 't heel sjoon. Mien hobby's zeen hockey en nao de sjtad gaon mit vrundinne. Ich haaj heel väöl van sushi, 't is mien favoriete aete en wat is 't jaomer det door 't coronavirus Vastelaovend neet doorgeit. Veer make d'r mer 't bëste van! xx Lee-Vienna!

Ich bön **NINA** en ich bön 12 jaor. Ich zit al vanaaf mien 6e bie D'n Uul en mien hobby is danse. Mien lievelingsaete is sushi!

Hi, ich bön **MARIT NELISSEN**, bön 12 jaor en woon in Sint Joost. Ich höb twee hele leve ponnie's womit ich aan sjpringwèdsjtrieje deilnaem. Ich train d'r edere daag veur óm sjteeds baeter te waere. Sins 4 jaor dans ich bie D'n Uul en vanaaf dit jaor doon ich mit bie de Jeuggarde. Det vinj ich heel sjiek óm te doon. 't Allersjoonste vinj ich óm op paad te gaon en same mit alle maedjes te danse.

Hoi, ich bön **CHARLOTTE** en bön 12 jaor. Ich bön dit jaor nuuj bie de Jeuggarde mer höb waal al 6 jaor bie de Kienjergarde gezaete. Ich zit op 't ROER Kelezje Schöndeln, mien hobby is hockey en mien lievelingsaete is chili con carne.

KIENJERGARDE SLEEP-OVER

De kienjergarde sleep-over begós mit Beugele bie Braam. Giel goof oetlik en al flot waerde d'r op hoog niveau gebeugeld. Bibi en Floor ginge d'r mit de eerste plaats vandoor.

Nao 'ne baom van versbezorgde Sushi en pannekeuk mit kruudje en Nutella waas 't tied veur de sjpektakelsjow 'Kienjergarde gots talent'. Alle maedjes hadde 'n act veurbereid. De jury besjting oet Lola Ratering van de Prinsekepel, aad-sjtadsprins Vito Campos en Zoë van Asten van de Jeuggarde en Kienjermusical, neet de minste Uule dus.

D'r waas nogal get talent aanwezig. Saar had heerlike cupcakes, Viënna en Elisa dejé 'ne TikTok, Nina en Lee Viënna TikTokte d'r ouch op los, Floor leep 'ne kata van Karate, Marit dejé 'ne TikTok, Sara had 'n enorme serie TikTok dansjes, Bibi dejé 'ne goocheltruc, Tirza e gedich en Charlotte had prachtig versierde cupcakes. As verrassing kwaam aad-jeugprins Cas mit aad-adjudante Keane en Tijs e nummerke van Sjraöm bringe.

Det de Kienjergade ouch individueel heel väöl talent haet waas de jury waal dudelik. 't Waas dan ouch gein gemekkelike besjissing, mer oeteindelik kreeg de dichteres de baeker. Naendet de beugelbaan aangevaeg waas, ging 't feeske toet 'n oer of veer sjnachs bie Tirza door mit 'n film en heel väöl anger plezeer.





Angere euver DJ Admin



Wiese Oet Zuus

"Waat begós op 't Sjtasieplein is oetgeloupe op 'n toffe samewirking. Same 'n huuj hómmmer moge make en kiek wie dae clip oetzunt! Zo geit 't eigelik altied, eine grote puinhoup!"

Mike Kanders

"Admin appete in de zomer of ich 'n Limburgs leedje mit 'm wól opnaeme en Admin wis persies wékk leedje d'r móos komme veur ós. Normaal zing ich Nederlandstalig, mer hae sjreef: 'Maot, sjétel dich deze veur in 't Limburgs.' 't Injrizzeltaat is super gewaore. Admin haet det goed geregeld, 't is 'n gevarieerd album gewaore mit versjillende bekinde artieste."



Big Benny

"Resjepk wie dae 200% geit veur zien passie en wie hae sjool en dj'en in 't boetelandj kómbineert. Höb 'm via de Veldjmuus en Remunjse Toppers lere kinne op zien vakgebied. Hae haet ech sein geveul veur ritme, kins se neet naodoon wie dae dans, mer hae veult 't pebliek super aan en maak 'n fees. Oos samewirking begós mit. "Zóls se neet aaf en toe 'Gaaas!' wille rope?" en móos se kieke waat 't gewaore is."

Danny Pouwels

"Admin is zónne sjike gas, zo bekind, mer gaar neet arrogant. Oprech, eerlik en heel grappig. Nump ouch de huuj generasie dj's op sjleiptouw. Admin is geweldig óm mit same te wirke, hae is ech zichzelf, knatsjigek, duit zien dink en det maak 't geweun top. Hae haet keihel gewirk in de coronatied, nachte werk, neet normaal!"



Scan de QR-code en bekiek alle clips die dees artieste mit DJ Admin höbbe gemaak.





Zomaar get bezeukers van 't Sjnapnazebal



Jip is vandaag ram in 't goldj verkleid, hae kump veural bie 't Sjnapnazebal óm leuke sjelle te doon, mer ouch veur e lekker breudje wórs netuurlik!



Noah haet 't bezunjer nao ziene zin bie 't Sjnapnazebal, veural vanwaege de meziek en de chips!



Mila is hie mit de ganse famielie sjpesjaal veur Cas I. 't Sjteit op de foto mit opa en oma en 't haet Stadts-Garde blood.



UULE ART

SJTAP VEUR SJTAP

Wils se der toch sjoon gesjmink opsjtaon dit jaor, óndanks des se ein móndjkepke op móos? Dan is dit mesjen waal ein sjminkje veur dich. Volg de sjtappe en ouch dich höbs ein sjoon gesjminkt sjnuutje.



1

Pak ein paar kleurkes dies se sjiek vinjs en bring dees aan mit ein sjipunske. Tip: as se mit ein sjipunske euver de lien geis wo de kleurkes same kómme dan kins se ze sjoon in-ein minge.



2

Zit ein paar dröppels baove de uig en aan de ziekantje van 't gezich. Neet te väöl, want veer gaon zo nog wiejer versiere!



3

Tied veur get bleumkes! Pak een bleumkes penseel en laaj deze gans vol mit witte sjmink, daonao maaks se 't puntje van de penseel zuver en laaj se dao nog ein tweede kleur in. Door de häörkes van de penseel langzaam neer te ligke kins se ein blomeblaedje sjtempele.



4

Veer veuge get confetti toe! Kees een paar sjoen fel kleurkes en zit mit de puntj van 't penseel get sjtipkes in de buurt van de blome en de blomeblaedjes.



5

Bling bling! Plek ein paar sjieke sjteinkes in de bleumkes en op anger plekke óm 't gesjminkte sjnuutje gans aaf te make. Mit glitters is alles sjieker!



6

Pruuk op, eine hood, tooi of blomekrans oppe kop en doe bös der gans klaor veur!

Wils se nog meer van zo'n sjieke geshminkte sjnuutjes zeen? Kiek dan zeker ins oppe instagram van Ingrid van de Sôkkertantes (instagramnaam: sokkertantes)

Sôkkertantes
PAINTERTAINMENT

SLEEP-OVER JEUGGARDE

T Waas de nach véúr de Nach van de Nuje Sjadsprins..... vriedaag 3 jannewarie 2020.
Wie eder jaor haje de maedjes van de Jeuggarde weer eine sleepover mit mekaar ingepland. Nog aeve ein moment net veurdet 't drökke sezoen mit oos nuuj Sjadsprinse zól beginne.

De aovend begos mit eerst mit zien alle get gezondj en lekkere sjnacks make, mit eine goje baom geit namelik alles baeter. En dan geine kantj en klaore of aafhaalkraom, mér vers en zelf gemaak. Naodet de sjnacks klaor ware en op taefel sjtinge ginge de dametjes knutsele mit krelkes en waerde óngertösse


de kuns van 't sjminke oetgepreeert op de snuitjes en de erm.

De aovend waerde aafgesjlaote door eers de grote gezamelike sjlaopplaats in de hoeskamer klaor te make en daonao waas 't toet heel lat in de nach Bigscreen-TV-tied en sjpelkes doon oppe tillevies en tillefoon.

Nao ein kópte nach waas 't sjmorges tied veur ein duchtig gemeinsjappelik óntbijt. 't Lètste vrieje wiekend veur ein heel drök nuuj Vastelaovessezoen waas gezellig en es goo vriendinne óngerein aafgerónđ.



Vastelaoves waordzeuker



REMUNJ
VASTELAOVEND
UULEJONGES
CHIPS
KNOEVELE
WIESEOETZUUS
WITTEKIRKSKE
CONFETTI
GEZELLIG
HOONDERVEL
OPTOCH
FRISTI
SJOON
UUL
VLEISBOEKET
BALONNE
JEUGPRINS
BACCHUS
STICKERS

UULE Logo sjmink

't Uule logo is es sjabloon te kriege biej D'n Uul door ein email te sjture nao info@dn-uul.nl en biej de Póppedokter Wiermans-Genang op 't Munsterplein.

- Tips om 't Uule logo op te bringe zónger det de sjmink ónger 't sjabloon doorlop:
- Sjmeer de achterkantj van 't sjabloon in mit Pritt, daonao plekse 't sjabloon mit de klein óngerdeile good op 't gezich.
 - Mit eine sjons op ein sjtekske de sjmink deppe en zeker neet te naat aanbringe
 - 't Sjabloon d'r aaf haole en 't zit perfek.



Galerie van (aad)jeugprinse mit häör adjudante



2018
Enzo I mit
adjudante
Sjors en
Stijn



2019
Daniek I mit
adjudante Job,
Vinn en regel-
tante Bibi



2020
Cas I mit
adjudante Tijs
en Keane



Kiek veur de foto's van
de ajere aad jeugprinse
en häör adjudante en ouch
veur de interviews op
www.dn-uul.nl



COLOFON

Riddaksie

Hein Jambroers
Esther Verhagen
Frits Criens
Liz Engelen
Luuk Hendriks
Roel Hendriks
Hetty Jacobs - Wiermans
Ton Hensen
Harry Allers
Dennis Engelen

Mit dank aan

Vórs Dirk I
Ingrid Breugelmans
DJ Admin
Wilma Favre
Carla Klaver
Karin Straus
De Jeuggarde
De Uulejónges
De Kienjer en leijing van
de Kienjermusical
Esther Willemse
Marijn van Etten - Baars

Fotoos

Femielies van de Kienjergarde,
Jeuggarde, Uulejónges en
de Kienjermusical
Harry Allers
Dagmar Cillekens
De riddaksieleje

Oetgaaf

Sjtadsvastelaovesvereniging D'n Uul
Posbös 11, 6040 AA Remunj

Vormgaaving

Ontwerpbuuro M
www.ontwerpburom.nl

Drök

ARS Printmedia

Ketak:

www.dn-uul.nl
uulewapper@dn-uul.nl

Copyright 2021

Alle sjrieversrechte mit betrekking
toet de inhald van dees oetgaaf
waere oetdrökkelyk veurbahaje.
Dees rechte beröste biej Sjtadsvast-
elaovesvereniging D'n Uul Remunj
ofwaal biej de betreffende sjriever



Rabobank Roermond-Echt: trotse sponsor van D'n Uul!

*Goed voor jouw vereniging &
geweldig voor de regio*

